

8. POUTŪTERANGI MARAE
TAKURUA



8. POUTŪTERANGI MARAE TAKURUA

He pā a Raropua ki Te Puna, i te pito o te rori o Tangitū. Ko te pā tēnei o Tūtereinga, tama a Ranginui.

Ka noho a Takurua ki tēnei pā. He tangata kaitā; pakaua, māia hoki. He tangata huruhuru hoki; nā konei tōna kaha pea. I rongonui ia hei toa kairākau o Raropua.

I tētahi rā, ka whakaeke mai te tauā ki Raropua. Ahakoa te māia o Takurua me āna toa, ka horo te pā i te hoariri, ka whakarērea e Takurua me āna toa. Mokori noa, he tai timu i taea ai e Takurua te oma mā te tāhuna o Waikaraka. Heoi anō rā, i kitea, i whāia wawetia e tētahi peka tokotoru o te tauā. I tērā atu taha o te tāhuna, i kitea e Takurua tētahi waka kua pae ki uta. Nā te ohore, i makere i a ia āna rākau ki Raropua. Ākene pea, he hoe mata arero hei rākau māna ki te patu i te tokotoru i te whai i a ia.

Engari mō tēnā. Kāore he hoe i te waka; he tatā anake kua mahue iho ki runga rā. Aua atu, i tīkina te tatā e Takurua, ka piki i te ara pou pou mai i te tūone, i a āna kaiaru i te whakatata atu.

I te mata o te aupiki rā, ka huri a Takurua ki te tokotoru i te aruaru i a ia. Ka piki te tuatahi ki a ia ka rere tana tatā, hāua ai te māhunga o taua nanakia rā.

Ka piu atu anō tōna ringa, ka tukia te rae o te tangata tuarua, ka mate. Ka nanaohia te taiaha o te tuarua, ka huakina i te tuatoru. Inā tata, ka takoto te ika tuatoru hoki.

Nā konei, i tōna māia, i hau te rongotoa o tēnei tuahangata o Te Pirirākau.